

24. oktoberi 2016

UKA2016/73

Atuarfinni sorlerni meeqqanut inuusuttunullu ajornartorsiutitik pillugit saaffigisinnaasaminnik amigaateqarnerisut pillugit, amigaatillu taakku qanoq iliuseqarfigineqarsinnaanersut pillugit pilersaaruteqartoqarnerisut aallaavigalugu Naalakkersuisut UPA 2017-imut nalunaarusiornissaannik suliniuteqaqqullugit Inatsisartut aalajangiiffigisassaattut siunnersuut.
(Inatsisartunut ilaasortaq Anthon Frederiksen, Partii Naleraq)

Inatsisartunut ilaasortaq Anthon Frederiksen Partii Naleraq siunnersuuteqarpoq atuarfinni meeqqanut inuusuttunullu ajornartorsiutitik pillugit saaffigisinnaasaminnik amigaateqarnerisut pillugit Naalakkersuisut nalunaarusioqqullugit aalajangiiffigisassatut saqqummiussaarluni.

Nunatsinni meerartagut tamarmik toqqissillutik inuuniarnerminni peroriartornissaat sutigut tamatigut tamatta inuiaqatigiit akisussaaffigaarput, tassami meeqqat inuusuttullu ingerlalluarpata tamanna siunissamat pitsaasumik inuiaqatigiinnut sunniuteqartussaammat.

Nalunngilarput meeqqanut angajoqqaat akisussaasuusut aammalu angajoqqaarpassuaqarpoq ulluinnarni inuunerissaartunik inissisimasunik meeqqaminnut paarsilluartunik tamannalu aamma nipituumik nersualaarutigissallugu puigussanngilarput. Tassami meeqqat atuarfianni aamma malinnaalluarnermikkut meeqqat atuarneranni siumukartitsisunik tamakkulu tassa tulluusimaarutissagut amerlasuunut malinneqallaqqunartut.

Ukiuni makkunani meeqqat atuarfinni inuttut ajornartorsiortut isumaginninnikkut ikiorsigassat amerlasuujusut tusartarpat, ilaatigullu ilinniartitsisut meeqqanut sumiginnakkanut annertuumik ajornartorsiuteqartartut, allaat ilinniartitsinissaminnut nukissaalatsisarlutik.

Ilaatigut ulluinnarsiutaavoq ilinniartitsisut atuaqatigiinni piffissarujussuaq atortaraat meeqqat sumiginnakkat sulissullugit, tamannalu ilungersunartoq atuaqatigiinnut allanut sunniutarluni, allaat tamakkiisumik ilinniartitsinermikkut atuaqatigiinnut tunniussinngitsoortarlutik, meeqqat sumiginnakkat suliassaavallaarneri pissutigalugit.

Pissutsit tamakku ilungersunartut pitsaanerulissappata taava kommunit peqatigalugit suleqatigiinnissaq aallartitaraqarparput, tassami nalunngilarput kommunit pisussaaffigigaat, kisiannili meeqqat inuusuttullu siunissami angusarissaarnerussappata kommuni kisiat utaqqinagu aamma Namminersorlutik oqartussat akisussaaqataallutik suleqataasariaqarput.

Inuiaqatigiinni inuunerput qivaraanni ullummikkut meeqqanut atugassarititagit assigiinngitsorujussuupput tamannalu assut ilungersunartutut isigaarput.

Atukkagummi qivaraanni ulluinnarni inuuniarnikkut atukkat naligiinngitsorujussuupput ilaqutariippassuit ajornartorsiuteqarput. Ilaqutariit inigisaminnik akiliisinnaannginnertik pissutigalugu aniatinneqarsimapput, ilaqutariit suliffissaaleqinermik eqqorneqarsimasut amerlapput, amerlasoorpassuit ilaqutariit meerartallit inisimasuinnaapput, ataatat anaanallu kisimiillutik meerartallit inuuniarsaripput. tamakkuninnga meerarpassuit ulluinnarni inuuniarnermikkut ajornartorsiutinik eqqorneqarsimapput tupinnanngitsumillu ulluinnarni atuarfinni allanilu ajornartorsiuteqarlutik.

Tamakkulu ikiorneqassappata taava Namminersorlutik oqartussat aamma akisussaaffimmik tiguseqataasariaqartut oqaatigerusupparput. Tassami kommunit kisimik taamak annertutigisumik sulinissaminut nukissaqanngillat isumaginninnikkummi sulisuusut amigarlunnarput ilaatigullu sulissutassaagaluit sulissunneqanngitsortartut meeqqat illersuisuannik ersarissumik oqariartuutigineqartarpoq.

Ajornartorsiutit meeqqat nalaattagaat ukiuni kingullerni annikilliartunngitsut takusinnaavarput meerarparujussuit angerlarsimaffiup avataanut inissinneqarsimasut ersarissumik kisitsisaatigalugit ilisimavagut.

Taamaattumik meeqqat isumagineqarnermikkut ajornartorsiuteqartut pillugit akisussaaqatigiilluta ingerlasariaqarpugut, tassami ersarissumik takusinnaavarput kommunit kisimillutik tamanna kivisinnaanngikkaat.

Meeqqat illersuisuat sinerissami angalaanerminni assut meeqqanut atugassarititaasut pitsaangilluinnartut ersarissumik inuiaqatigiinnut oqariartuutigalugit qujanartumik saqqummiuttarpat.

Taava pissutsit tamakku ilungersunartut nunaqarfinni illoqarfinnilu atugaasut pitsaanerulersissagutsigit suliniarnerit annertusartariaqarpagut, akisussaaffillu tamatta tigusariaqalerparput, kommunit Namminersorlutik oqartussat inuiaqatigiillu tamatta kivitseqatigiittariaqalerpugut, taamatummi ingerlaannarsinnaajunnaaratta pingaartumik meerarparujussuit taamak amerlatigisut ajornartorsiortillugit.

Taamatut oqaaseqarluta Anthon Frederiksen Partii Naleraq siunnersuuta ataatsimiititaliami suliarineqarnissaa innersuussutigaarput.

Hans Enoksen